

[8.]

QUÆSTIO QVODLIBE- TICA.

¶ An liceat stipendia sub Prin-
cipe religione discrepante
merere.



¶ Excusum CANTABRIGIÆ.

Ann. Dom. MDCXXX.

12

1831

1831

1831

1831



An liceat arma tractare sub stipendiis Principis religione discrepantis
Tractatus.

Nobiles quidam *Itali* qui rei militaris discendæ gratiâ in exercitu Ordinum in *Belgio* merent, proximâ septimanâ sanctâ se coram Confessario quodam *Hagæ* stiterunt, ut peccata confiterentur, & ab ipso absolutionem impetrarent: Verum Religiosus ille, quem in Patrem spirituales elegerunt, absolutionem negavit omnibus.

Nihil unquam leve aut parvi æstimandum visum est, ubi religionis & conscientiæ negotium vertitur, sed magni potius momenti; præsertim verò ejusmodi censenda sunt, in quibus de remissione offensarum contra Majestatem divinam admissarum agitur, & de consolatione spirituali ex sanctissimis Pœnitentiæ & Eucharistiæ Sacramentis capienda. Nec dubium quin, si Confessarius injuriâ neget absolutionem ei cui debetur, animarum se Tyrannum constituat, gravissimè divinam Majestatem offendat, auctoritate spirituali abutatur, & cum in proximum tum in sanctam Ecclesiam gravissimè peccet.

Super hac causâ responsurus quid juris sit divini & humani, quidq; conforme S. Theologiæ & Canonibus Sanctæ Ecclesiæ Catholicæ, ut ordinatè & perspicuè procedam, actionem Confessarii in absolutione Pœnitentibus negandâ non nisi ab aliquo istorum capitum oriri posse arbitror, aut pluribus conjunctim:

i Vel à scrupulo quem habebant isti Nobiles commorandi in illa regione ubi militabant; id quod ad Pœnitentem spectat.

A 2

2 Vel

2 Vel (quod ad Confessarium pertinet) Quodd is præceptum & mandatum severum acceperat ut ita faceret.

3 Vel quia res ipsa id poscat; quodd, cum illi Nobiles *Itali* essent, non liceret ipsis in regionibus *Belgii* D D. Ordinibus subiectis habitare.

4 Vel denique quodd, artem militarem facitantes sub signis DD. Ordinum fœderatorum, id facerent contra *Hispania* Regem & Domum *Austriacam*. Nam quo alio fundamento niti potuerit ille Confessarius, mihi quidem in mentem non venit. Et de hisce singulis dicam brevissimè, iis tantum quæ opus sunt adductis juxta Doctrinam Catholicam.

Quod ad primum attinet, in confessio est apud Theologos in primis, deinde & Canonistas & Casuistas qui dicuntur, mentis errorem circa actiones humanas, quoties de iis finistrè judicat, quæ *Conscientia erronea* dicitur, obligare. Adeoque si Pœnitentes illi coram Confessario injectam sibi religionem, & tantum peccatum confessi essent, quodd in illis regionibus confisterent, aut militarent, nec illo scrupulo liberari potuissent, Confessarius ex conscientia regulis absolutionem ipsis denegare & poterat, & debebat. Neque enim absolvi potest qui adhuc in peccato perseverat, nec qui tametsi erroneâ conscientia persuasum habet, quodd peccat, & ab eo non vult abstinere.

Sed hoc in nostro casu locum non habet. Nam expressè adjectum est, ipsum Confessarium fuisse, qui Pœnitentibus scrupulum injecit ea de re, quam ipsi nullo modo peccatum existimabant, adeoque nisi promitterent se ex illis regionibus discessuros, absolutionis consolationem spiritualem negavit. Id quod facile hoc argumento constare poterat. Nam si Pœnitentium scrupulus fuisset, verisimile non est omnibus eundem futurum, & eodem modo, ita ut omnes absolutionis incapaces fierent. Quodd si etiam omnibus idem scrupulus incidisset, Confessarius aut illum justum, & cui aliquid fundamenti suberat cognovit, aut sine ratione & sine fundamento: Si justum, hoc illud est quod post ostendetur fieri non posse; si absque rationis fundamento, nempe erat ille ex conscientia regulis obligatus ipsos instruere, & operam dare,

ut

ut errorem deponerent. Neque fit verisimile, omnes eodem modo tanquam uno cerebro præditos, rationis incapaces fuisse & in erronea conscientia confirmatos, ut eam ob causam omnibus eodem modo absolutionem negare oportuerit. Accedit eò, (quod in alia causa à magno quodam Doctore dictum est) ignorantiam planè asininam, & timorem leporinum futurum fuisse, si omnes illi Nobiles re cum amicis & propinquis diu in patria consultatâ, utrùm ad bellum proficiscerentur necne, & electâ consultò tam longinquâ regione, tanto cum periculo & impensa (propterea quòd illius disciplinæ Schola sit hoc tempore totius *Europa*, imò verò totius orbis terrarum præstantissima) omnes (inquam) quasi de compacto annum integrum expectassent, ad scrupulum conscientiæ adeò tenacem concipiendum, ut eum nè justæ quidem persuasiones Patris spiritualis eximere potuerint cuiquam, & illum ad sanam mentem revocare. Quare hoc quidem caput prorsus exclusum est.

Quod ad secundum; Jamdudum est quòd Curie *Romanæ* fautores, quique se ad Monarchiam *Hispanicam* promovendam totos dederunt, prætextu religionis ità subtiliter & universè omnibus in rebus abutuntur, nihil ut intentatum relinquant, ubi specioso religionis mantelo (cujus tanta vis est apud homines) sibi commodare possint, rationes suas promovere, & immensis suis cupiditatibus velificari. Unam sibi viam aperuerunt, quam & usu faciunt quàm tritissimam, hanc nempe quam dicam: Ità exposcente boni communis necessitate, justisque & legitimis rationibus cum publicæ administrationis & boni regiminis, tum propriæ conservationis introductum est, quod etiam omni jure licet, ut multi Principes Catholici majores & minores, Legatos, Secretarios, & certos homines suos, penes illos Principes & rerum potentes teneant, qui tamen si Christiani, non sunt tamen uniti cum sede Apostolica *Romana*, nec ei nè in spiritualibus quidem eam præstant obedientiam quam ipsa requirit. Quamprimùm igitur intelligunt aliquem designatum esse legatum, statim pervestigant quem Sacerdotem secum ducturus sit, ut sibi in iis regionibus sanctissima Sacramenta ministret. Cognito quis sit, continuò vehementer eum oppugnant, magnis promissionibus & ingenti

præmiorum spe ostensâ, aut (prout homines erunt) minis etiam
& terroribus conscientiæ, cum argumentis speciosis à cultu divi-
no & propagatione Catholicæ Religionis (hæc enim semper in
præsidio, hæc in excubiis est) ut eos ad ipsorum mandata acci-
pienda & secretò cum ipsis sentiendum inducant, nec ab iis stipu-
lantur modò, verum & iusjurandum exigunt de ipsorum manda-
tis accuratè exequendis. Hoc cum omnibus sine exceptione ten-
tatum, in aliquibus adedò feliciter ipsis successit, ut legati pro re-
ligiosis, quos credebant secum educere qui animæ & familiæ suæ
curam haberent, compererint se stipendium dare hominibus,
qui rationes Curiz *Romanæ* & *Hispanicæ* accuratissimè observa-
rent, illuc referrent deferrentq; pleraque omnia, & pro eo quòd
attendere ad animas suæ curæ commissas debuerant, Parochi &
Plebani facti essent alienorum subditorum; non sine magna illo-
rum Principum exacerbatione, quibuscum legati benevolentiam
conservare &, communis defensionis gratiâ, augere student. Hinc
adedò enatæ sunt continuæ illorum Principum querelæ, ab hisce
talibus sollicitari & contaminari subditos suos, seditiones procu-
rari, defectiones conflari, celebrari conventicula, & concilia illicita;
cùm Principes illi certò persuasum habeant, de religione mi-
nimam esse cogitationem, hanc quidem prætextum inservire, sed
revera illum esse finem, ut malè affecti erga præsentem rerum ad-
ministrationem conveniant & cognoscant inter se unà cum se-
questris, per quos secreta consilia cum externis habent, & sub hoc
operimento tam specioso contra Rempub. moliri possint & ma-
chinari. Et habent, ut sibi videntur, magnas formidandi causas, &
vehementer suspicandi, quòd ab ejusmodi coitionibus & integu-
mentis bona pars conjurationum, machinationum, & seditionum,
principium duxerit. Et, quoties de hisce rebus sermo incidit, revo-
cant semper ad memoriam confœderationes in *Gallia*, quæquæ
contra Principum capita passim toties tentata sunt, Pulverariam
in *Anglia* conjurationem, *Vallis-Telluræ* occupationem, & mo-
litiones confimiles. Et quod ad Capellanos attinet, est adhuc in
recenti memoria, quòd Legatus quidam, qui credebatur se comitem
ducere Capellanum satis eruditum & admodum acutum, ante-
quam Patriâ suâ excederet, sic eum à Ministris Curiarum quas su-
præ

præ memoravi imbutum & institutum habuit, ut postea in suo munere perfungendo nomen Capellani amiserit, interpretis & *Corycei Romani & Hispani* invenerit. Alius tot mimos hero suo agendos imposuit, ut ipsum legati nomine amisso Archiepiscopi fecerit adipisci; quod & ei in illa Natione unde missus est adhuc hæret. Neque verò conscientiam aut zelum religionis Catholicæ veram hujus studii causam fuisse, satis argumenti creditum est, quod quidam ex his grandem pecuniam donariorum nomine in sacra *Æde Lauretana* offerendam, aut consignatam sibi, aut callidè extortam, post in proprios usus converterit. Quòdque Confessiones, reconciliationes, & exercitia Religionis in adeò ordinariam & quotidianam amorum conciliationem & deliciarum confæderationes sint conversa, ut nondum etiam sit extincta illius invidia infamiæ. Ex quo illud malum consecutum est & adeò detrimentum ipsi religioni, quod cum in ædes & hospitia legatorum satis magnus numerus Catholicorum ex iis regionibus convenire soleret, ut divinis officiis interesset, & sanctissima Sacramenta secundum Ecclesiæ *Romana* ritum perciperet, penè obsoleverat sanctum hoc institutum, quod tantum Deo cultum, tantam ipsi legationi dignitatem afferebat.

Hæ corruptelæ eos adegerunt qui ad ejusmodi legationes obundas designantur, ut animum applicent & accuratè provideant, ut Religiosi ab ipsis assumpti ad id munus ità animo comparati proficiantur, debita cum modestia se gerendi, ut lineas nè transiliant: Et cultum quidem divinum procurent, & religionis Catholicæ augmentum, sed cum prudentia & moderatione: Quo in genere illustria exempla adferre possem multorum legatorum, qui sine cujusquam offensione, aut ulla causa querimoniæ data, proculdubio religionem Catholicam plus promoverunt modestâ religiosorum cunctatione, & moderatâ temperantiâ, quàm illi *satagentes*, aut (ut *Franci* melius) omnem lapidem *removentes*, qui nimio studio plus destruxerunt quàm ædificârunt. Cujus rei indicium est successus consequens, & quidem major indies, quod sine data querelæ occasione, eadem imò major sit frequentia Catholicorum, qui exercitiis Religionis Catholicæ *Romana* interveniunt, cum augmento cultus divini & religionis haud contem-

nendo,;

nendo , qui scopus humanarum actionum principalis esse debet.

Confessorem igitur illum de quo loquimur hoc in mandatis disertè expressum habuisse, nè Pœnitentes *Italos* absolveret qui in illis regionibus commorantur, non abhorret à verisimilitudine. Siquidem rem tanti momenti, quanti est à Sacramentorum participatione prohibere, haud facturus erat religiosus privatus, absque magna aliunde instigatione; præsertim quod non solum à pietate sed ab omni prudentia abhorreret, cum in iis regionibus tot artibus aggrediantur, ut unum aliquem (si fieri possit) à religione Protestantium ad Catholicam *Romanam* reducant (cujus illud maximum experimentum est si ad Sacramenta percipienda adducatur) illos ab eorum participatione prohibere velle, qui se ab infantia Catholicos professi sunt. Sed demus etiam, illum in *Italia* ejusmodi mandata exequenda non accepisse, neque per literas, quod & solet, & facile fit; nihilominus fieri potest ut in ipsis *Belgii* regionibus ad id agendum inductus sit. Nam illud sine ulla dubitatione constat, Nuncium qui *Bruxellis* residet omnia quæ ad religionem spectant in *Belgio* consilia moderari; & Ministros constituere, qui sub alia specie & persona illud opus promoveant, quod nos conversionem ad fidem Catholicam appellamus, Protestantes seditiones contra statum Reipublicæ proseminare. Nec desunt Nuncio satellites apppositi & audaces, quales sunt multi personati Jesuitæ, & alii præter hos Religiosi.

Erat in more positum etiam sæculis præteritis, quod & adhuc observatur, ut episcopi & præcipuè Pontifices *Romani* expeditiones faciant, missis in regiones ab infidelibus possessas hominibus religiosis, cum authoritate spiritali amplissima absolvendi in casibus reservatis, dispensandi in votis, Indulgentias, & gratias concedendi, & id omne faciendi, quod pro conversione infidelium ad sanctam fidem Catholicam, aut pro corroboratione & consolatione fidelium, qui adhuc in illis partibus unde religio Christiana ejusque libera professio, ab infidelibus pulla est, necessarium erit & opportunum. Solebant *Romani* ut plurimum temporibus præteritis operâ uti Fratrum Minorum Observantium, quibus concessa leguntur in variis Constitutionibus Pontificiis privilegia amplissima; aded ut etiam Pastores titulares creati sint earum regionum,

gionum, ubi tantæ pietatis opus exercebant. Postquam verò acti sunt Jesuitæ (qui, præter quartum votum quod missiones præcipue tangit, habent in arcanis institutis illud peculiare, quoddam habitum deponere possint, & alium qui magis placuerit induere, & se in milites, mercatores, aulicos, & quamcunque aliam professionem transformare, sectam quoque & religionem quamlibet simulare, *Gentilem, Turcicam, Judaicam, hæreticam*, & quamcunque ad eum finem quem sibi proposuerunt ipsi putant expedire; quæ de causa fortasse à Patre *Aio* dictum est, *Jesuita est omnis homo*) missiones ut plurimum, præsertim in regiones à Protestantibus possessas, Jesuitarum fiunt; cæteris religiosis illæ relictæ sunt in quibus minor est profectus spes, plus periculi. Hi se diffundunt in *Anglia*, in *Germania*, & ubique, & hoc quidem tempore magis quam unquam antehac, propter novam Congregationem *Rome* erectam jam nunc multis opibus conspicuam & magna Ministrorum copia, quæ *De propaganda fide* nuncupatur. Jam eorum qui in *Belgium* mittuntur, præter mandata quæ secum *Roma* & à Superioribus attulerunt, quasi moderator est etiam Nuncius Summi Pontificis qui *Bruxellis* residet: unde illius operâ pro certo haberi potest ita cum illo Confessore actum, & illa semina sparsa, è quibus fruges huic similes enascuntur, quod horum Nobilium conscientias ita mirum in modum ex improvviso turbaverit. Siquidem ut introductio missionum suprâ dictarum habuit ab initio pro origine & causâ principali pietatis rationem, zelum religionis, & conversionem ac salutem animarum; ita certum est eam postea plurimum degenerasse in affectus & rationes humanas, & ejusmodi expeditiones intersuisse explorandis administrationibus temporalibus, speculandis publicis opibus, regionum factionibus, politiarum defectibus, & quibus modis imperia debilitent, civiles discordias serant, Principes aut exponant contemptui, aut eorum existimationem minuant, milites fortissimos seducant. Tandem devenerunt ad seditiones concitandas, inquietos & præsentibus infestos fovendos, confederationes contra Principes formandas, conjurationes ordiendas, aliósque confimiles effectus pessimi exempli & existimationis, qui sanctarum illarum missionum officium adeò denigrarunt ut eas emissiones

hominum sanguinariorum, proditorum, infidiatorum haberi fecerint, atq; ab adversariis abominandis illis titulis insigniri, quos *D. Paulus* in Epistola ad *Romanos* sub finem primi Capituli in homines mente reprobos accumulat. Catholicos quidem sapenumero pudicum est malitiæ in missionibus istis nuperis adauctæ: ac tametsi fructuum qui ex tam detestandis seminibus nascuntur satis fecunda fuerit hæc ætas; tamen ex quo tempore bellum contra Protestantes exarsit, multò major copia fuit; ut, in præsentia ardente bello tam horrifico Regis *Hispania* contra *D. D. Ordines Belgii* Confœderatos, mirandum non sit si Nuncii Pontificii *Bruxellensis* Ministri, qui personati in illas Provincias se spargunt, impressionem aliquam faciant solito majorem. Huc respectum aliquem habere oportuit illum Confessorem, atque ex eo quod sibi injunctum videbat, nè quos absolveret, qui Ordines armis defendunt, animadvertere debebat, religionem Catholicam solummodo prætextum esse, ceterum finem verum esse factionis rationem, quæ cum religione nihil habet commercii: nec eam unquam talibus mediis amplificandam docuerunt antiqui. Sed & illud insuper respicere debebat, se ex autoritate Nuncii aut Deputatorum suorum non pendere, nec illum Ordinarium esse suum, nec ab ipso se autoritatem auscultandi Confessiones accipere; has clandestinas machinationes abominandas esse coram Deo, & zelum esse adulterinum qui religionis pallio passionis & studia humana cooperiat: Nimis etiam absurdum fore, si, cum Legati & eorum familiæ (ut quidem bonis authoribus placet) Principibus apud quos resident subiecti non sint, sed iure gentium liberi & exempti, solique naturali Superiori suo suppositi, qui ipsis ad ministranda Sacramenta inservit, leges ab alio accipiat qui sit extra id Dominiũ, & illi ipsi Principi serviat qui bellum ei inferat. Nam cui dubium esse potest quin ei quicquid mali inferre poterit conaturus sit, præsertim verò in labefactanda militum fide qui sub eo merent, velut in causa præsentī se res habet? Tametsi sine horrore nè cogitari quidem potest quàm insignis injuria fiat divinæ Majestati & ipsi Religioni, cum tanquam *Medusa* caput pro spectro ad conscientias timidas perterrefaciendas adhibetur, atque (ut res tota uno verbo concludatur) religi-

religione ad fines profus mundanos, fortasse etiam injustos & tyrannicos, hoc est ad Dominia iis auferenda quibus à Deo concessa sunt, abutuntur. Itaque ut hoc Caput absolvamus, iniquum erat, & religioni contrarium, quod Confessor ille præscriptum secutus sit professi Ordinum illorum inimici, obtentu cæcæ obedientiæ; neque aded insignitam injuriam D D. illis facere debebat, haud examinato prius, utrùm causa iusta an injusta subesset absolutionem ejusmodi Pœnitenti negandi. Præterquam quod magnâ ratione & perquam evidenti opus est ad excludendum aliquem à Sacramentorum participatione, quod vinculum est longè gravissimum. Et quod ab *Hieronymo* scriptum est, *Non debent Prælati aliquid sibi de Pharissærum assumere supercilio, quasi in ipsorum arbitrio positum sit ligare & solvere; sed conscientia Pœnitentis, & cause meritum spectandum est.* Adeoque ad ultima duo capita res tota deducitur, quæ restant examinanda, quod in iis cardo negotii versetur,

Ex quibus Tertium est, An Confessor ille causam legitimam habuerit absolutionem negandi, quod non possint Nobiles illi absque peccato in regionibus *Belgicis* habitare, ut quæ Pontificem *Romanum* pro Capite Ecclesiæ non recognoscant, & recusent illi obedientiam præstare, & propterea quod non sit ibi publicum exercitium Religionis Catholicæ *Romana*.

Hæc ratio superioribus temporibus nullam speciem habuisset, sed potest aliquam dubitationis umbram obtendere, ex quo *Clemens VIII* primus omnium hoc sibi sumpsit, ut in hac materia unum ultra passum procederet. Siquidem anno MDXCVI Constitutionem edidit, Nè quis *Italus* quacumq; de causa, etiam negotiandi & mercaturæ, se in aliquem locum transferret, ubi non sit Parochus, & Ecclesia publica, in qua sit exercitium religionis ritu *Romano*; nisi obtentâ prius licentiâ à Sancto officio Inquisitionis, aut loci Ordinario: Obligans etiam eos qui cum ejusmodi licentiâ proficiscerentur, ut quotannis Inquisitoribus fidem facerent, quod confessi essent peccata & communicassent. Hæc fortasse illa causa esse potuit, ob quam Confessor, & ille cui morem gerit, Pœnitentes suos ita duriter tractârit.

Verum & illud scire debebat, Constitutionem istam Pontifi-

ciam à nullo Principe receptam fuisse, aut in usu positam, imò verò usu contrario exclusam prorsus, perinde ac si nunquam facta fuisset : adeoque in illa locum habere doctrinam Communi- nem Canonistarum, & Juris Civilis Professorum, & Pontificum ipsorum, imò Juris Divini & Naturalis, quòd nempe omnis lex humana positiva (quo in genere ejusmodi Constitutiones Pontificias comprehendì à nemine Catholico Doctore negatur, aut negari potest, nisi quis ex homine Deum facere velit, imò supra Deum) in tantum valet quatenus recepta & in more posita est; quòd si recepta non sit, aut contrarium ulu obtineat, omnem obligandi vim amittit, & eodem loco est ac si facta non esset. Quod si secus foret, omnis administratio confunderetur, destrueretur omnis politia, Pontifices non solum fierent omnium Dominorù & Principatum Domini, omniumq; causarum judicialium, omniumq; Tribunalium, sed & cæteris nè cogitandi quidem hisce de rebus facultas relinqueretur. Nam quid est omnino de quo Pontifices jam ab aliquot retro seculis Decreta non fecerint & Constitutiones? Verùm imperando non acquiritur jurisdictio, sed legitime imperando, si obtemperatio accedat. Itaq; super hac Constitutione tanquam fundamento nihil extrui potest; Constitutione in ipso partu abortivâ, nec antè natâ quàm ejectâ; rejectâ, inquam, ab omnibus, à nullo receptâ, apertè etiam prohtente Principum non nemine apud ipsum Papam ejus conditorem, recipi non posse. Neque verò ullam omnino observationem habuit, sed ità perseveratum est ac si facta non fuisset, scientibus Ecclesiasticis, & ipsis Pontificibus, & eo ipso à quo facta est.

Et jure quidem : nam Pontifex ille auctoritatem extendit ad illam libertatem restringendam quam Deus & Natura, omnes leges divinæ & humanæ, usq; omnium temporum à principio mundi usque 1596^{um} salutis nostræ decursum fidelibus concesserant. Sciunt qui nòrunt historias sacras, post mundi creationem continuò inter ipsos *Adami* filios factam fuisse Religionis divisionem, cum alii verum Deum adorarent cultu puro ac legitimo, qualiscunq; tandem is fuerit, alii Idola colerent: neq; tamen invenient fidelibus (non de populorum sed hominum singularium separatione loquor, quanquam & illa tanquam casus fuit

fuit soli Deo reservatus) prohibitum fuisse nè in iis locis habitarent ubi essent impuræ aut falsæ religionis sectatores; sed veris Dei cultoribus semper permillum est, ut irent, confisterent, & habitarent ubi magis commodum esset. Id ipsum continuatum fuisse constat toto illo tempore quo *Hebraei* inter *Gentiles* habitabant, & in civitatibus Idololatrarum ubi visum esset. Et hoc perpetuò duravit in adventum usque Domini Nostri in mundum: quo tempore satis constat ex Scripturis N. Testamenti veros credentes (qui tunc erant *Hebraei*) per *Asia*, *Africa*, & *Europa* regiones dispersos fuisse; ex quibus etiam nonnulli erant *Roma*. Sed & inter *Hebraeos* per id tempus erat secta quadam, quæ in Evangelio dicitur *hæresis Sadducæorum*, quæ negabat ullam esse creaturam spirituales, angelum, aut animam, aut mortuorum resurrectionem; attamen & habitabat cum cæteris, & cum illis alii, neque quisquam sibi sumpsit ut hanc libertatem reprehenderet, aut prohiberet, nè quis proficisci posset aut commorari ubi optimum videretur.

Pqst promulgationem S. Evangelii mansit inter Christianos hæc eadem libertas per omnia secula, nec unquam usque ad *Clementem VIII* reperietur quinquam contrà ausum esse. Et tamen fuerunt in Ecclesia tot sectæ, divisiones, & hæreses aded potentes, ut civitates, regiones, regna & imperia integra occuparent (veluti *Ariani* nominatim qui orbem univèrsu occupasse videbantur) ut ea de causa *Hieronymus* acerbissimè conquestus sit, obstupuisse mundum quodd *Arianus* factus esset. Possederunt isti unà cum Principibus ejus sectæ Imperium Orientale, *Africam*, magnam *Italia* partem; neque tamen reperietur unquam existimatum fuisse, auferendam Catholicis libertatem, nè quod proficisci possent, morari, habitare, negotiari, ubi collibisset. Quodd si quispiam unus eo pacto in discrimen adduci videretur, cum eo scorsim per amicos & alios homines spirituales hortationibus & admonitionibus agebant: interdictis generalibus cum omnibus unius nationis nunquam ausi sunt, nec ejusce rei exemplum reperietur. Extat è contrario D. *Pauli* doctrina Apostolica, Si ex duobus conjugatis unus fidelis fuerit alter infidelis, & hic cohabitare cum fidele consentiat, habitandum cum

I. Cor. 7. 13.

illo, nec ab ejus societate discedendum: Cui Canonistæ hanc regulam superstruxerunt cum illa sola exceptione, Separationem tum demum præcipi, cum sine Creatoris injuria cohabitari non potest; quæ regula multò magis nostro proposito inservit. Neq; ad rem faciunt Canones de excommunicato aut hæretico evitando: aliud est enim ab unius commercio abstinere, cui in Ecclesia irrogata sit censura; aliud habitari non posse in illa regione, cujus fides à nostra discrepet. Nam hoc modo quod contra hæreticum in favorem religionis inventum est, in præjudicium cedit libertatis hominis fidelis & Catholici; quem nemo sanus dixerit sine injuria Creatoris in aliis regionibus habitare non posse: alioquin oportebit omnes Catholicos *Anglia, Hybernia, Scotia, &* cæterorum regnorum adigere, ut ex hisce locis discedant.

Et quoniam proficisci aliquò, & alicubi morari, habitare, negotiari, militare, res sunt omnes civiles, non spirituales; si quis de iis posset aut deberet statuere, hoc ad officium Principum Secularium pertineret, in quo Ecclesiastici nihil habent quòd se immisceant, nisi alienam auctoritatem ultro sine lege aut Scriptura, imò contra omnem legem & Scripturam usurpare velint.

Quòd si hoc ipso tempore hac libertate gaudent cæteræ omnes orbis Christiani regiones, adèd ut à Pontificibus & Prælatibus neque *Hispanis*, neque *Gallis*, nec *Germanis*, aut *Polonis* Catholicis prohibitum sit, quòd minùs proficiscantur aut domicilium habeant ubi velint; quid causæ est cur soli *Itali* pejori conditione sint, ut eis hæc servitus imponatur? Nempe aut ad salutem pertinet hæc res, aut contrà. Si non pertinet, quid est quòd Ecclesiastici falcem immittant in alienam messem? Quòd si salutis negotium est, in eo neque Scripturæ, neque sancti Apostoli ullum unquam discrimen nationis aut gentis cognoverunt. Neq; verò Ecclesiastico in ejusmodi materia decernendæ potestas concedetur propterea quòd aliquo etiam modo ad salutem expedire judicabitur: nam ipsi Canonistæ qui Prælato indirectè potestatem dant in temporalibus jubendi, ausi non sunt ulteriùs progredi, nisi quatenus temporalia ad salutem necessariò pertinent; non per convenientiam, aut quòd melius ad eam perveniri possit. Alioqui enim Ecclesiastici in omnibus omnino rebus leges dare possent:

sent: nam fieri potest ut utile existiment ad salutem diversorum hominum, huic Ecclesias fabricare, alii bona sua erogare pauperibus, alii uxorem non ducere, alii hoc potius modo quam illo se vestire, alii mercaturam relinquere, Principi alicui magistratu se abdicare & vitam privatam degere, alii artem quam profitetur relinquere: ita omnium prorsus facultatum, omnium ditionum, (quid plura?) etiam cogitationum domini futuri sunt. Verum si potestas indirecta de iis tantum intelligatur, quæ sunt ad spirituales finem necessaria, restat ut ostendat is qui auctoritatem præcipiendi vendicat, quemadmodum ista prohibitio *Italæ* tantummodo necessaria sit ad salutem, non autem cæteris nationibus, & quamobrem hi soli salutem suam operari non possint, quamdiu in ejusmodi regionibus incolunt; aut si id ipsis impedimento esset ad salutem, quonam modo id auferat chartæ schedula quam pro licentia secum ferant. Quod si insuper in easdem Protestantium regiones mittunt ipsi Ecclesiastici Religiosos, qui alio prætextu occultè Sacramenta iis ministrent, qui tametsi sub Principibus Protestantibus vivunt, religione sunt Catholici; nempe sentiunt comprobantque, eos salutem suam licet indè non discedant operari posse. Idem igitur & *Italos*; imò & minori obstaculo: nam cum sint inquisiti, licet ipsis etiam publicè in ædibus Legatorum exercitium religionis Catholicæ profiteri. Non potest igitur Ecclesiastica potestas eos ad discedendum coarctare, etsi utilius ipsis judicaret in *Italia* vivere. Siquidem, ut jam dictum est, sola necessitas etiam ex Canonistarum sententia confert ipsis indirectè in temporalibus præcipiendi potestatem. Alioqui si pro religione Catholica melius putarent, ut Papa etiam in temporalibus regna *Francia*, *Hispania*, & *Germania* possideret, præcipere possent ut hisce ipsi cederetur. Ipsum Redemptorem nostrum videmus res utiles quidem magisque ad salutem conducentes, sed non necessarias, sub consilii libertate non præcepti vinculo relinquere voluisse. Quantò igitur minus poterunt Ecclesiastici sine necessitate in re temporalis præcipere, quod ad salutem duntaxat plùs conferat? nedum in hoc negotio, quod cerni non potest quomodo plùs conducatur, præterquam ad rationes amplitudinis ipsorum temporalis. Verum

rum hoc discrimen quod in rebus spiritualibus nullo modo locum habet, in quibus D. *Paulus Iudaeum*, *Gracum*, aut *Barbarum* non agnoscit, homines acutiores peruestigârunt: observantes Ecclesiasticos ex quo tempore auctoritatem suam supra regiones *Ultramontanas* valde diminuerunt, operam dare ut intensivè in *Italia* acquirant quod alibi extensivè amittunt, omnibus ad id artibus, omni studio adhibito, & omnia ad spiritualitatem & religionem revocantes. In quo Principes attento inprimis animo esse oportet, sicuti & fuerunt, non admissâ aut ullo modo receptâ Constitutione supradictâ, quâ non obstante *Itali* Sereniss. Republicæ *Venetæ*, Ducibusque *Sabaudia*, & *Toscane* subditi, proficiscuntur mercaturæ causâ, aut cujuscvis alterius negotii in quasunque regiones. Sunt ex iis in *Anglia*, in *Germania*, in civitatibus quæ Principibus Protestantibus subiectæ sunt, passimque, prout res ipsorum sese dant, invitantque. Ex communi igitur consensu omnium ditionum Catholicarum licitum est in illa libertate perseverare quam Deus & natura concedit, quæque Ecclesiasticorum arbitrio subiecta non est, utpote quæ ad salutem spiritualem non spectat, saltem per connexionem necessitatis.

Sed operæpretium est animadvertere, quanti hoc momenti sit. Est enim Principibus quàm hominibus privatis multo iniquius; quodque hîc tentatur ejusmodi est, unde principum ducatur usurpationis insignis, & in administratione civili haud vulgaris perturbationis. Nam illud pro certo habendum est, quod modò innuimus, Quoties de rebus agitur quæ ad animæ salutem pertinent, in quibus saltem Prælatus Ecclesiasticus auctoritatem habet leges condendi & præcipiendi, nullum personarum discrimen constitui posse. Itaque Pontifex etiam *Clemens VIII* in Constitutione prædicta sine ulla personarum aut causarum exceptione vetat universè, nè quis sine licentia ordinariorum Inquisitorum aliquò proficiscatur, ubi non sit publica Ecclesia, & Parochus, & exercitium religionis ritu *Romano*. Per hanc igitur Constitutionem, non poterit Princeps Legatos ordinarios aut extraordinarios mittere in ditiones Principum à Sede *Romana* disjunctorum. Et cum usu venire possit ut ex ratione & necessitate rectè administrationis oporteat secretum aliquem hominem mandare alicujus nego-

negotii causâ, quod Ecclesiasticum scire non conveniat, tamen aut totum ei revelandum erit, aut censuras incurrendum & Inquisitionis reatum. Quæ inconvenientia adeo clara sunt & frequentia, ut usurpationem manifestam ostendant. Essêtque valde iniquum si Papa & *Hispanus* possent (quod faciunt quotidie, & extant exempla non ficta sed ex rebus ipsis petita) in Principum ditiones, ubi nulla est publicè Ecclesia aut Parochus *Romanus*, Jesuitas, & alios religiosos etiam ex severioribus mandare, (sive negotii causâ, sive fraudis, aut explorationis, quisque prout animo affectus est pronunciat) cæteris Principibus neminem mandare liceat nisi re cum ipsis comunicatâ. Et quoniam in Oriente etiam ubi mercatura est quæstuosissima, vix ullo in loco ubi negotiandum est Ecclesia publica reperitur, non licebit illic sedem figere sine licentia. Certè si Principibus hoc modo in suis negotiis ab aliis pendendum sit, rationesque rectæ administrationis & propriæ defensionis necessitas, aliorum utilitatibus & arbitriis submittendæ; non sunt amplius Principes supremi: actumque est de Majestate, si alii quàm Deo ratio reddenda sit, legesque accipiendæ, quid facere oporteat, quid non facere, ab alio quoquam quàm ab illa divina.

Verùm superat omnem fidem aut charitatem Christianam modus cum istis Nobilibus procedendi. Expectatur ecce tempus quo culparum suarum conscientia compunctus vir Nobilis ut cum Deo redeat in gratiam peccata confessurus accedat: & tunc adeo duriter & rigidè tractatur ut (quod intolerandum est) absolutionis consolatione spirituali privetur. Et nolumus porro ut ab iis qui separati sunt ab Ecclesia *Romana* dicatur, Confessionem adeo à prima institutione degenerasse, ut facta sit medium non consolandis animabus, sed promovendis rationibus & conatibus temporalibus Curie *Romane* & *Hispanice* contra alios Principes, & explorandis aliorum studiis, subditorum fidei corrumpendæ, instillandis affectibus, augendis factionibus intèrvire; & ejus generis alia.

Ex iis quæ hætenus dicta sunt mihi quidem certum videtur, satisque probatum, quòd, si Confessor absolutionem Pœnitentibus negaverit ob hanc solam causam quòd in illa regione quæ se-

parata est ab obedientia Pontificis *Romani* confisterent, Poenitenti injuriam fecit, Confessione abusus est; & si id fecerit iustum alterius cujuscunque, mandatum illud injustum fuit, indebitum, cum alienæ autoritatis usurpatione, & scandalo dato, per abusum autoritatis spiritualis ad fines merè mundanos.

Causa igitur quæ prætendatur non potest esse alia quàm illa quæ quarto loco proposita est: nempe quòd in exercitu D.D. Ordinum *Hollandiæ* contra Regem Catholicum ex professo militarent. Id verò in hoc proposito ab altero duorum capitum istorum oriri oportet, vel quia Catholicis ab eorum partibus quos Ecclesia *Romana* pro hæreticis habet prorsus militare non licet; vel quia bellum quod ipsi gerunt injustum est. Et hæc duo capita faciliè discutientur.

Quod ad primum attinet; adhibenda est necessariò communis doctrina Jurisconsultorum, quæ nemine contradicente in causa defensionis, auxilii, aut favoris hæreticis præstiti, distinguit. Siquidem duobus modis hæretico favor aut auxilium ferri potest, *Formaliter*, aut *Non-formaliter*. *Formaliter* appellant hæretico favorem & auxilium præstare (ut ipsis verbis utar Jurisconsulti. cujusdam, &, quod in ejusmodi materia ad instar mille aliorum testimoniorum est, Jesuitæ) quoties quis favorem præbet aut auxilium hæreticis, aut ob eam causam quoniam hæreticam ejusmodi doctrinam profitentur, aut respectu & ordine ad doctrinam hæreticam, nempe ut eam alios docere possint, aut sustinere. *Non-formaliter* id dicunt, quoties causa quæ movet ad favorem, auxilium, aut defensionem præstandam non est ipsa hæresis, sed amicitia, consanguinitas, gratitudo, naturæ bonitas, inopia, aut auxilii indigentia, aut similia.

Quibus positis, hæc statuunt; leges Canonicas, & Constitutiones Pontificias etiam Bullæ Cœnæ Domini, quæ sunt omnium quas unquam Ecclesiastici excogitare potuerunt severissimæ, primo duntaxat modo intelligendas, quando hæresis aut falsa doctrina pro scopo aut incitamento habetur; non autem secundo, Neque enim talis extensio esse potest legis Pœnalis aut Pontificiæ; alioquin id esset officia humanitatis prohibere, & opera bona, essetque præceptum injustum, tyrannicum, quod nullam

viam

vim ad quenquam obligandum obtineret. Ut applicemus ista ad propositum; Cum sola & vera causa cur isti Nobiles sub D.D. Ordinibus *Hollandiae* stipendia merent, sit studium disciplinae militaris sub illo Duce percipiendae, cui sine controversia omnes nostrae aetatis duces cedunt; nec ullum respectum habuerint ad doctrinam aut religionem quam in illis regionibus homines profitentur: Imò, cum clarè constet ex eo ipso, quòd se ad Confessionem stiterint tempore à summis Pontificibus constituto, ipsos in religione Catholica *Romana* perseverare, neque favorem præbent aut militant propter aliquem respectum religionis cum *Romana* non consentientis: Cum, inquam, clarè constet etiam secundum doctrinam Canonistarum, ipsos Ecclesiastico quicquid possunt attribuire, certè plus quàm ei convenit; nec ullum omnino hac in re peccatum commiserint, nedum piaculum aliquod inexpectandum; non poterat ille Confessor sine manifesta injuria, & sine abusu Confessionis ad fines Politicos & indebitos, absolutionem ipsis negare.

Hoc loco non erit à proposito alienum, duas molitiones ingentes, sed abstrusas, in hoc negotio commemorare. Una est *Hispanorum*, altera *Ecclesiasticorum*: nam ex compacto rem gerunt, *Hispani*, quantum intelligi potest ex literis multorum Equitum *Italarum* qui sub eorum signis contra D.D. Ordines militant, habent hoc sibi propositum, ut militare Sacramentum exposcant ab iis quicunque sub ipsis merere volunt, se nunquam contra domum *Austriacam* militaturos; idque ab iis qui honores militares assequuntur apud ipsos exigunt omnino, & sine exceptione. Itaque si hoc alterum caput obtinere poterunt, mediante Confessione, & religionis prætextu, nequis militatum in Protestantium castra proficiatur; ex eo consequetur neminem fore qui artem militarem ediscere poterit, quin simul juramento *Austriacae* familiae obstrictus sit, etiam contra naturalem suum Superiorem. Neque enim adeò in cunabulis est mundus, ut ex ipso intuitu faciei praesentis *Europae* prædicere non possit, nullum bellum fieri posse, quod vel à principio non sit inter Catholicos & Protestantes, aut progressu non fiat tale: in praesenti quidè periodo iste rerum status est, Adeòque ceteri Principes Catholici aut nullum habituri sunt

subditum qui bellum viderit, aut cujus fidem suspectam habere non debeant. Atq; hæc una est inter cæteras gravissima ratio, quæ multis Equitibus *Italæ* persuadere possit, ut bellum in *Hollandia* sectentur, cum inter Catholicos *Romanos* alibi nullum sit.

Altera molitio *Ecclesiasticorum* propria, majoris est adhuc momenti: ad quam non dubium est quin oculos adjiciant, tamen si adhuc eam retere non audent: sed ab his principiis facile eam intelligendam exhibent iis, qui cognovint quibus artibus tantum alienæ potestatis occupaverint sub e mentita religionis specie Principum simplicitati imponentes, & apud populos ejusdem religionis viribus tanquam machinæ cujusdam adhibitis. Si privatis hominibus peccatum esset, quod à participatione Sacramentorum excluderet, ab eorum partibus militare qui Pontificibus non obediunt; multò majus id esset in Principibus, qui cum ipsis fœdera defensionis mutæ sanciant, pecuniam contribuunt, aut mittunt auxilia militaria. Hoc illud arcanum est, hoc centrum quod istæ lineæ diriguntur. Sed res est nimis ardua adhuc, necdum materia disposita est: scætus hic est qui maturescit indies, sed parturienti tempus expectat. In sermonibus quidem aliquid effutiant, & propter prælorum Typographicorum, quem sibi assumpservunt, dominatum, sententias quasdam à suis scribendas curant; nondum tamen ad decernendum descenderunt, ejusmodi confœderationes & auxilia propter necessitatem propriæ conservationis illicita esse. Sciunt *Hispania* Reges nullius se peccati reos existimare, si pecuniam Reformatis in *Francia* clanculum subministrant, ut ardente in illo regno bello civili, ipsi facilius alibi Principes minores opprimant; nec ipsi Nuncii Pontificii ad hæc charitatis officia se ministros & sequestres præbere dedignantur. Sciunt Coronam *Francia* jam tot annos fœdera cum *Helvetiis* Protestantibus habere, cum pactis defensionis, item cum alta *Rhætia* Protestante, quibus auxilia dat ordinaria & extraordinaria contra quoscunque, etiam contra Catholicos qui ipsos oppugnent, aut perturbent: quodque veteres habeat confœderationes cum Protestantibus *Germania*, quod præsidium Reipublicæ *Genevensis* suo stipendio alat, præter donativum annuum viginti quatuor mille coronatorum, ut se ipsam defendere possit; eamque

cámque defenderit contra *Sabandum & Hispanum* Principes Catholicos, quotiescunque ipsi bellum intulerint. Et ex quo primum tempore bellum exarsit in *Belgio*, usque ad hodiernum diem, Reges Christianissimi D D. Ordines *Hollandia* semper defenderunt, alentes perpetuò stipendiis suis aliquot cohortes peditum, & pecuniæ auxilia extraordinaria suppeditantes. Jam militum *Francorum* qui ad illud bellum proficiscuntur major pars semper ex Catholicis fuit; ordinum ductores Catholicis; cujus rei documentum esse potest D. de *Roelant*, totque alii duces & antesignani è *Belgio* ad stipendia Serenissimæ Reipublicæ *Venetæ* profecti. Totòque hoc tempore ex omnibus regionibus Catholicorum etiam ex *Italia* ad illud bellum se contulerunt, sine discrimine cui parti visum est accedentes, nec unquam Ecclesiasticus ausus est intercedere. Ex quo communis totius Ecclesiæ sensus elici potest, & nominis Christiani, qui hanc novitatem convincit injustitiæ, & usurpationis, studiisque sub religionis obtentu unius factionis contra aliam promovendæ, quod scandalum plenum & pessimi exempli est, atque ut tyrannicum omnium sententiis confossum. Cúmque publicæ conservationis ratio sit inter humanas suprema, imo divina-naturalis, solique Supremo qui Majestatem tenet commissa, oporteret Ecclesiasticum tandem aliquando vanam illam & ridiculam prætensionem abjicere, quasi salus & defensio populi ad Decreta Juris Canonici exigenda sit, quæ ratio tantò supremæ illi inferior est, quantò jus humanum divino, & positivum naturali. Soli siquidem Supremo unà cum Majestate Deus facultatem dedit pacem, & bellum, fœderaque & societates faciendi, prout necessarium & opportunum judicaverit: nec præter eum quisquam circumstantias ejus quod opportunum est & ex usu cognoscere potest; sicuti corpus regere nihil aliud potest, quàm illa sola anima, quam illi Deus & natura attribuit.

Atque ut manifestius appareat hujus incepti iniquitas, ut recentia omittamus, cum satis notum sit *Sixtum V.* cum *Hispanorum* consilia perspecta haberet, qui se Protectores religionis Catholicæ ferentes, hoc obtentu ad omnium Potentiorum oppressiorem affectant viam, Coronam *Francia* ad defensionem Ordinum

Belgii efficaciter instigasse, eosdémq; sensus (seriùs licet) habuisse *Clementem VIII & Paulum V*; Verùm ut clariùs innotescat novæ doctrinæ falsitas, quam per obliquos istos tramites in praxin deducere tentant, Quòd nempe *Catholicis militibus non liceat in Protestantium gratiam militare*, ut eò perveniant, idq; obliquè insinuent, *Non licere Principibus Catholicis fœdera sancire, aut iisdem auxilia præbere*, exclusâ sub prætextu religionis ratione recti regiminis, propriæ defensionis, & necessitatis ad sui conservationem, poterat quidem adhiberi inductio exemplorum, omnium temporum, quorum extat memoria in historiis sacris aut profanis; sed ego paucula aliquot adducam ex illustrioribus.

Primum exemplum tantò erit insignius, quòd in sacra Scriptura extet, magni illius Patriarchæ qui à *S. Paulo Pater credentium* appellatur, cujus actiones nemo tam audax erit ut vituperare sustineat, aut ejusmodi existimet quæ in imitationis exemplum non proponantur. De *Abramo* igitur narrant sacra literæ, quòd, cum captus esset *Lot* frater ejus à Regibus quibusdam *Syriæ* qui bellum regioni intulerant, nec *Abramo* per se satis esset virium, fœdus inierit cum *Eschole & Aner* Principibus Idololatri, pactisque cum ipsis societatis conditionibus, conjunctis viribus prælium commiserit, fratrem liberaverit, victoriam reportarit. Ecce fœdus sancti Patriarchæ cum Principibus non modò diversæ religionis, sed infidelibus & Idololatri. Sequitur deinceps aliud exemplum, Regis secundum cor Dei, & Prophetæ qui & ex *Christi* majoribus fuit secundum carnem. *David*, cum ei à Rege *Saul* persecutio mota esset, cum tota cohorte sua quæ erat militum ad 600 quibus ipse dux præerat, ad stipendia Regis *Achis* se transtulit, fœdus cum ipso pepigit, habitationis locum ab ipso accepit; imò & in bello contra fideles ipsos ei interfuisse certum est. Nam cum bellum inter Regem *Achis* Idololatriam, & *Saulum* qui populo Dei imperabat motum esset, volebat *David* prælio interesse; verùm id Rex non permisit, quòd ipse sùsq; ejus fidem suspectam haberent, metueréntque nè quando ad manus ventum esset, signa transferret ad suos. Attamen conquestus est *David* quòd ad prælium illud non admitteretur, perinde ac si injuriam accepisset quòd ei fides non haberetur

tur; ex quo certum est ipsum animo paratum fuisse ad pug-
 nandum pro infidelibus contra veri Dei cultores & veræ religionis
 professores. Qui ad *Davidis* personam animum adverterit, tan-
 ti Regis, tanti Prophetæ, tam sancti hominis, dabit certè veritate
 convictus, licuisse id & licere aliis Principibus, cujus in Scriptu-
 ra adeò illustre exemplum habetur; Id autem est Ducis cum
 copiis omnibus fidelibus ejus ductum sequentibus, qui sub Rege
 Idololatra stipendia meret contra propriam religionem, sub fal-
 sa nempe contra veram. Certum est & illud, eundem *Davidem*
 postquam ad coronam pervenisset, fœdus fecisse & conventa san-
 xisse cum *Naas* Rege *Ammonitarum*, & *Hiram* Rege *Tyri*:
 neque dici potest hoc fuisse tempore extremæ necessitatis; nam
 hæc fœdera cum Principibus jam dictis infidelibus & Idolola-
 tris icta sunt, postquam *David* regnum *Israelis* pacificè posse-
 dit. Ejus etiam filius *Solomon* & regni successor, cum *Aegypti*
 Rege societate & fœdere conjunctus est, quocum etiam affinita-
 tem contraxit, ductâ ipsius filiâ. Sed & *Asa* Rex *Hierosolymo-*
rum, de quo testatur Scriptura sacra, quod perfectum cor habue-
 rit versus Deum sicut *David*, *Benhadadum* Regem *Damasci*
 contra *Baasam* Regem *Israelis* opem poposcit; quod erat, cum
 Rege infideli contra unum ejusdem sæculi religionis fœdus inire.

Habemus temporibus nativitati Redemptoris nostri viciniore
 bus exemplum *Machabeorum*, qui cum *Romanis* fœdus defen-
 sivum sanxerunt, cujus conventa in Scriptura divina clara sunt;
 cui primùm bellum accidisset, de mutuis auxiliis, comiteatuum,
 armorum, navium, pecuniæ, & militum, pro viribus, & prout
 temporum rationes permitterent. Iidem *Machabei* fœdus etiam
 cum Republica *Spartanorum* fecerunt, qui in *Peloponneso* domi-
 nabantur, & id sæpe renovârunt, & multoties confirmârunt. Ex
 quibus divinæ Scripturæ exemplis comprobatur, licere Principi-
 bus fidelibus fœdera jungere, auxilia dare & accipere, si propria
 conservatio id poscat, à Principibus infidelibus: & valebit conse-
 quentia à majore ad minus in causâ præsentē. Nam utcumque
 D. D. Ordines *Hollandiæ* non sint uniti sub Ecclesiæ *Romanae*
 obedientia, sunt tamen Christiani, non Idololatæ aut infideles;
 & illud pronuntiatur quod Curia *Romana* adulatores disseminare

nare satagunt, *Hæreticos Idololatriæ esse peiores*, est quidem peraccommodatum rationibus Ecclesiasticorum temporalibus & mundanis, sed non item sacris Scripturis conforme, aut doctrinæ veterum sanctorum Patrum. Horrescit animus vel cogitare, hosce homines id velle, tolerabiliorem & minùs abhorrendum esse qui *Christum* seductorem vocat, aut pseudopphetam, quàm qui eum invocat ut Deum, & in sanctum ejus nomen baptizatur, & ejus Sacramenta percipit, agnoscitq; solum illud nomen datum esse sub cælo in quo homines salvos fieri oporteat. Quòd si apud antiquos scriptores legatur aliqua sententia quæ huic opinioni favere videatur, ex eo factum est, quòd illi hæretici Divinitatem *Christi* negabant, totumque *Christianismum* fundamentum evertabant, erantque potiùs infidelium secta quàm hæretici; nec hujus generis qui Deum ipsum confitentur, & in hac confessione fundamentum salutis agnoscunt. Verùm ut hunc etiam cavillum auferramus è medio, agè videamus exempla fœderum cum ipsis hæreticis, & simul etiam infidelibus.

Sub Imperio *Romano*, cum Principes fidem *Christianam* & Catholicam *Romanam* profiterentur, plene sunt exemplis historiarum cum Ecclesiasticarum, tum cæterarum, Imperatorum & Principum maximorum & pientissimorum, qui fœdera & amicitiam coluerunt cum Principibus infidelibus, & ipsis etiam hæreticis.

Certum est *Constantinum* de Catholica Ecclesia tam bene meritum, pro Imperii defensione conventa cum *Tartaris* & *Vandalis* sanxisse, qui erant Idololatræ: cum hæreticis non poterat, propterea quòd nulli adhuc essent cum dominatu; illis verò locos dedit habitandos in Provinciis Imperii *Romani*. Jam illis temporibus satis notum est quantopere floruerit Ecclesia hominibus sanctis, & zelo puritatis religionis flagrantissimis: nunquam tamen reperietur, quenquam aut factum reprehendisse, aut ejusmodi fœdera illicita docuisse; quod invictum est argumentum approbationis totius Sanctæ Ecclesiæ Catholicæ. Pòst, cum creatus esset Imperator *Valentinianus*, qui non solum Catholicus fuit, sed etiam singularis Ecclesiæ ejusque Episcoporum & Prælatorum fautor; erat eodem tempore in partibus Orientis Imperator *Valens* ejus frater, hæreticus Arianus, qui Catholicos persequabatur:

quebatur : & tamen inter istos fratres Imperatores, hæreticum unum, alterum Catholicum, unio, confidentia, & confœderatio semper fuit, pro communi defensione, & hostium imperii oppugnatione. *Theodosius, Arcadius, Honorius, & Valentinianus*, Imperatores multas conventiones fecerunt cum *Gothis, Alanis, Gepidis, Vandalis, Suevis & Francis*, qui partim Idololatæ fuerunt, partim hæretici; neque tamen unquam quisquam inventus est, qui hæc confœderationes tanquam rem illicitam reprehendere auderet, & vivebant illis temporibus magni illi Patres, Doctores zelo ferventissimi, lumina sanctæ Ecclesiæ, qui pro veritatis zelo veriti non sunt Imperatores & Imperatrices defectum suorum in faciem reprehendere. Vivebant illis temporibus, *Ambrosius, Hieronymus, Augustinus, Chrysostomus, Leo*, aliisque celeberrimi Pontifices Romani, Patriarchæ, Archiepiscopi, Episcopi, Capita sanctæ Ecclesiæ, quorum opera restant adhuc, qui cum nusquam reperiantur hæc confœderationes reprehendisse, necessarium confitendum est, hoc ipsorum silentium qui tanto cum zelo cæteros Imperatorum errores exagitant, approbationem demonstrare totius Ecclesiæ Catholicæ.

Post mortem Imperatorum quos dixi in *Italia* constitutum est regnum *Gothorum*, quod & diuturnum fuit. Hi Christiani fuerunt, sed *Ariani*, quæ secta fuit hæreticorum, quotquot unquam in Ecclesia fuerunt, pessima; nam personam ipsam *Christi* oppugnabat, cujus negabat Divinitatem, destruebaturque articulum qui religionis Christianæ fundamentum est, illum nempe de sanctissima Trinitate: attamen cum istis hæreticis tam perversis, dum in *Italia* regnabant, Imperatores *Constantinopolitani* qui Catholici erant, ut plurimum pacem coluerunt & fœdera; & ipsi Pontifices *Romani* illis subditi fuerunt, & obedientiam præstiterunt, non nemine etiam ex ipsis Pontificibus Legatus ab iis pro negotiis regni missus est, nec id facere recusarunt. Neque quisquam scriptorum aut Sanctorum illius temporis reperietur illos Principes Catholicos culpasse, quod cum istis Regibus hæreticis & tam enormibus erroribus infectis confœderationes tenerent. Infinitum esset omnia hujus generis exempla sigillatim recensere velle.

Postquam in Pontificibus *Romanis* ad dignitatem Pontifici-

am addita est Principis temporalis potestas in *Italia*, ex quo tempore tot leges formârunt quot in Decretalibus, Sexto, Clementinis, & Extravagantibus comprehenduntur, adeo ut nulla sit materia politica de qua extensâ autoritate suâ decreta non interpoluerint; non deîunt tamen exempla ejusmodi confederationum, quæ apud Historicos illorum temporum cerni possunt.

Georgius Pogibracchius hæreticus erat *Hussita*: eam opinionem habebat apud Ecclesiam *Romanam*, ob eamque causam à *Pio II* censuris infectatus est (observandum est hoc exemplum, nam certè causam ipsam religionis actam fuisse constabit) At tamen *Fridericus III* Imperator, ann. 1463, cum in obsidionis periculo esset *Vienne*, illum sibi in subsidium vocavit, pactionibus cum ipso factis de mutuis auxiliis, quæ ab ipso etiam Papa approbatæ sunt, qui proinde destitit ab ipso censuris persequendo. *Julius II*, ann. 1510, cum *Bononia* in periculo versaretur, propter exercitus *Gallici* vicinitatem *Chiappinum Vitellium* introduxit in civitatem ad auxilium suum, cum sexcentis Equitibus levis armaturæ, & *Turcarum* agmine; quibus & se ipsum plurimum concedidit. Et ann. 1538 *Paulus III* multos *Rhetos* Protestantes ad stipendia sua conduxit, qui & *Roma* multa fecerunt religioni Catholicæ contraria, quod & Papa ipsi satis notum erat: qui tamen apertè profitebatur, Angelos ipsos esse à Deo sibi ad tutelam mandatos, & ad sui defensionem licitum esse quodcunque genus hominum adhibere: extatque documentum fide dignum, ann. 1557 ad 3^m *Septembris*, respondisse eum cuidam qui id perstrinxerat, disertis hæc verbis: *Nobis licitum fuisset, imò laudabile, Turcas, Mauros & Judeos, ad defensionem nostram accire*: nec dubium est quin ad tractandum cum *Turcis* mandârit.

Jam hodierno die *Domus Austriaca* cum Principibus Protestantibus *Saxonicis* & aliis confederationes habet, auxiliâque iis & præbet & accipit. De Regibus Christianissimis adeo manifesta res est, ut verbis non sit opus, eamque suprâ attigimus.

Si igitur per historias Scripturæ sacre licitum est Principibus Catholicis defensionem & auxilium præstare etiam infidelibus, nedum

nedum Christianis, tametsi Pontificibus *Romanis* non obtemperant; idque re ipsâ faciunt, pecuniâ, militibus, commeatibus, neque id ipsorum pietati derogat aut professioni religionis Catholicae *Romanae*; privatis quoque licebit eisdem suo corpore adjuvare & defendere, neque solum peccatum non erit, verum opus bonum & laudabile. Et siquidem ii milites ex subditis essent Principis Catholici confederati, & qui pro communi defensione, & rectæ administrationis causâ, ex pactis fœderis Principibus illis Protestantibus opem ferat, tantò clarior res est propter subditorum cum suo Principe connexionem: cum lege divinâ subditi obligentur ad Principis sui fines coadjuvare, & quamdiu ad illos se conformant, peccatum certè non committant. Adeoq; Confessor ille gravem injuriam Nobilibus illis fecit, negatâ ipsis absolutione, sed Principi multò majorem intulisset in ejusmodi causa, meritòque castigandus esset, quod indirectè fœdus initum & auxilia præstita condemnâsset. Quod tametsi per seipsum iniustum & injustum est, cum id peccatum faciat quod non sit, multò pejus est quod in confessione tentatum fuerit. Et certè rectæ administrationis regula postularet, non impunè ferri temeritatem aut petulantiam adeò exorbitantem, ut audeat Religiosus unus privatus decreta sui Principis damnare, prudentissimè facta & ex publicæ utilitatis rationibus, quarum homo privatus nè capax quidem esse potest, nedum iudex, aut censor.

Sed tametsi absolutio neganda non erat propter habitationem in illis regionibus, aut militiam ad *Hollandorum* defensionem, fortasse negari debuit, quod injustum sit illud bellum: præsertim ei qui subditus non sit Principis à quo geratur, nec iustus à quoquam, sed suâ sponte id faciat, atque adeò peccati reus sit.

Hoc prostrernum est caput, de quo breviter expediemus. Si quidem concordēs sunt in eo omnes Doctores, bellum in quo defenditur territorium quod possidetur (atque adeò defensivum) vix dubitari posse quin iustum sit. Cum inter causas quas adferunt utriusque Juris consulti, & Summistæ itidem, ad bellum iustum constituendum, semper primum locum habeat sui defendendi necessitas. Qua de re sine longis allegationibus satis erit verbis *Covarruvia* concludere: *Inter alias causas belli gerendi quæ*

justissima habentur illa est praeter ceteris omnibus probatissima, & ad quam referri possunt quotquot allegantur, si sunt pro Republica defensione, pro defensione proprii Imperii, & Provinciarum ad id pertinentium: nam ita ad vitam & facultatum est defensionem. Hæc igitur defensionis causa bellum præcipue justificat: nam ipsa lex Naturalis ei præstat auctoritatem, aded ut bellum defensivum etiam à privato licite geri possit. Et tale quod sit bellum quod gerunt D. D. Ordines *Hollandia*, nempe defensivum, res ipsa loquitur: nam & invadunt eos Regis *Hispania* exercitus, & ipsi constanter pro sui defensione ad resistendum se comparant: Atque aded extra controversiam est, bellum defensivum semper justum esse, nisi adsit aliqua ejusmodi circumstantia, qualem vix animus comminisci poterit; per quam injustum reddatur; ut doctrina sit apud Jurisconsultos irrefragabilis, quod tametsi oppugnatus propria culpa meruerit aut injuriis illatis, ut ei bellum inferatur, tamen ei licitum sit se defendere, & si ob eam causam arma capienda sint & bellum faciendum, illud justum erit: non solum propter jus Naturale quod concedit vim vi repellere, verum etiam quia seipsum non defendere esset vitam suam, honorem, statumque alieno arbitrio permittere, & militum maxime, qui quam immoderate ferè se gerant in vita, honore, & facultatibus alienis tractandis, rebusque non minus sacris quam profanis, exemplorum atrocitate satis superque notum est. Quinetiam si bellum propter res justè repetendas motum fuerit, defensio tamen justa erit: nam ut inquit Jurisconsultus, *Oppugnans justà compensatione non erit contentus, neque militum furorem cohibere poterit nè modum superet.* Aded tanquam oraculum receptum est illud *Livii* dictum, *Bellum eis semper esse justum quibus est necessarium*: plùmque est & religiosum iis arma sumere, quibus nisi in armis nulla spes est reliqua; quod in omni bello defensivo locum habet.

Quod si quis hinc deducat, fieri igitur posse ut bellum utraq; ex parte justum sit, quod à Casuistis negatur; imprimis id non aded inconveniens videri debet, cum iidem ipsi & multò etiam solidiori cum fundamento Theologi & Legistæ doceant bellum ex utraq; parte justum esse posse, ex una *verè*, ex altera *juris præsumptione*:

sumptione. Nam cùm bellum sit tanquam lis inter eos qui superiorem non habent, sicut impossibile est utramq; partem litigantium justam causam habere, & tamen possunt ambæ justam habere causam litigandi, quia non constat ex qua parte jus sit donec id Judicis sententia statuat; & in ejusmodi causa nemo poterit in dubium vocare, quin reo liceat ad forum venire quò trahitur, de Actore tota dubitatio est: Ità in bello tanquam in lite quæ inter Principes supremos agitur, utcunque ambæ partes jus in causa æquale habere non possunt, attamen possunt ambæ justam ejus faciendi occasionem habere, propterea quodd dubitetur, ex qua parte fas sit. Sed illud clarum est, eum qui vim propulsat justum bellum gestum; de oppugnanter duntaxat erit ampliandum. Atque ut verum dicatur, hoc unum est ex iis quæ humanum cerebrum commissititur repugnante licet ipsa humanitate, ut de bellis quæ gerunt *Hispani* judicium fiat ad eundem modum quo de schismatis Ecclesiæ *Romana*; quæ cùm numero propemodum quinquaginta fuerint, illa pars semper obtinuerit quæ justiorrem causam habuit & magis legitimam; cùm tamen quoties arma moverunt & ipsi ad bellum profecti sunt, ex quinque quorum exempla legimus in historiis, *Joanne* nempe X, *Leone* IX, *Pio* II, *Gregorio* VI, *Julio* II, præter primum & ultimum intermediis tres superati sunt, & duo capti, inter quos unus pro Sancto canonizatus. Sed mirum ni aliter res se habeat. *Hispani* nostram memoriâ bellum moverunt omnibus populis, omnibus mundi Principibus (ut ita dicam) directè vel indirectè. In utraque *India*, novisque Orbibus, tot regiones occuparunt, tot liberos populos in servitutem redegerunt, dominos se vitæ ac bonorum constituerunt eorum hominum qui antea hisce fruebantur. *Anglia* bellum intulerunt, & *Hibernia*, quibus modis satis notum est; *Francia* etiam, confœderationibus (ut quidem nomen impositum est) sanctis, & propriorum ejus regni subditorum defectionibus: Principibus *Germania*, mutatis ut id jure facere viderentur nominibus: In *Italia*, Serenissimæ Reipublicæ *Veneta*, Duci *Sabaudia*, olim etiam Ecclesiæ & Papæ, directâ etiam *Roma*, & Pontifice capto: & apertè profitentur, magnam imperium sine bello stare non posse. Itane justitiam semper à se habent? nisi

fortè ex Gentilium illo pronunciato, quòd Deus faveat potentioribus; & satis erit ad belli iustitiam comprobendam quòd ipsi id gerant, tametsi etiam cœlo inferrent?

Sed nimium quantum interest de re aliqua in *Thesi* & in *Hypothesi* verba facere! Veniamus ad hanc ipsam causam, demùq; pro concessio, non vero, Regem *Hispaniæ* iure (quodcunque tandem id sit) D D. Ordinibus bellum intulisse: tametsi ipsi contrà asserunt, ab illo illatam sibi injuriam, subditis corruptis, & Consiliariis, disseminatis inter ipsos seditionibus & schismatis in religione (in quo Jesuitæ & alii Ecclesiastici ministri fuerunt & instigatores) aut violatam ab ipso fidem in omnibus quæ factis induciis juraverat, aut post, cum tempus opportunum iudicaret, iniuste arma contra ipsos suscepta. Ex his quid verum sit nolo jam discutere, relinquatur id suo loco: sed dum Rex certus Rempublicam illam oppugnandi apparatus facit, exercitus educit, quæro ab isto Confessore & postulo ut respondeat ex recta animi sui sententia, aut aliorum qui eam informant & intorquent, Quid facerent D D. Ordines? expectarent otiose inimicorum arbitrium & æquitatem, quippe qui iustæ compensationis terminos non essent migraturi; si modò hæc belli causa fuit? Et si Rex *Hispanus* sese illarum Provinciarum Dominum absolutum facere pertenderet, scilicet occupandas illi relinquerent, recederent ab armis, securi vitam sibi tutam fore, pudicitiam fœminis? Fabulæ sunt istæ malè feriatonum hominum, non consilia Principibus suggerenda.

Quòd si de bello movendo ageretur, poterat habere locum, iustumne illud an iniustum foret examinare: verùm Reverendus Confessor in Dominio versatur, bello jam tot annos implicato. Quid putat? Sene iudicem & arbitrum admittendum, utrùm id bellum ex parte D D. Ordinum iustum sit an iniustum? Ea de re sibi tanquam ex tripode sententiam pronunciandam? Enimvero homines cordati valde mirantur, & Principes iustam habent causam graviter indignandi, iustæque insuper vindicandi in temeritatem & petulantiam quorundam Religiosorum & Confessorum, qui muneris sui lineas transeuntes in Confessionibus Majestatem lædunt, & Principum se iudices & censores constituunt.

stituunt. Non constituit Princeps contributionem aliquam, aut vectigal imponit, quin isti continuo judices esse volunt, sitne causa justa an iniusta: itidem de confederationibus, de pace, & bello. Et ferendum esset utcumque, si modò sibi duntaxat id facerent; sed quod plus refert, fidem subditorum in Confessionibus contaminant, Principem in malam existimationem & invidiam conjiciunt, publicis administris conscientias perturbant, sensimque & quasi sine sentiu tantorum malorum auctores sunt, ut hostes ipsi Republicæ majora ei imprecari non possint. Miseram conditionem administrationis publicæ, quæ, cum divina ratio sit, & naturalis, & libera, nec cuiquam subjecta, eorum censuris subijcienda est, qui ejus nè capaces quidem esse possunt! Et bellica itidem ratio (habita, sicut est, ratio suprema) misera sit oportet, si subdenda sit ejus non dicam rationi, sed commentitiæ futilisque sententiæ, qui veras ejus causas nullo pacto cognoscere potest. Magna dubitatio homines rerum Politicarum intelligentissimos tenuit, utrum de belli justitia judicium omnino fieri possit: nam qui ejus justitiam constituere velit necessarium est ut legem constituat, ad quam exigatur. Verùm hoc modo non erit ratio suprema.

Sed omiffis disputationibus, illud adeò certum est ut à nemine negari possit, bonum commune & publicum cuius privato anteponendum esse; & hoc ex illo exigendum: cuius contrarium facere, perniciēs est Rerumpublicarum & omnium legum divinarum pariter atque humanarum perversio. Curam verò boni communis Deus Principi soli unà cum Majestatem commisit. Adeoque in ejus solius potestate situm est, præscribere, quibus modis conservandum & sustentandum sit, sive impositionibus vectigalium, sive bello, sive confederationibus, aliisve mediis: & in hoc, quicumque fuerit, sive Confessor, sive alius qui se judicem constituere velit aut censorem, Majestatem lædit, & contra honorem & reverentiam facit quam natura instillat, & Deus in sacris Scripturis Principi suo Vicario, & in administratione publica locum tenenti, ab omnibus exhibendam præcipit. Itaque homines pii, & boni Religiosi Principum decreta reverentur, non judicant. Et quod ad miserum illud refugium quo se excuset quis-

quispiam, Non se iudicem agere, sed bellum aliquod notoriè injustum esse posse; non potest ad præsentem causam applicari. Primum quia dici potest, *Quo jure est notorium?* Canonico, an Civili? Verùm hæc rationi bellicæ inferiora non superiora sunt. Deinde, *Utrum notorium est ratione boni publici, an privati?* Si privati; At hoc subjeci & bono publico cedere debet. Sin publici; Principis est illa cura. Denique in bello pro necessaria sui defensione hæc subterfugia locum non habent.

Quod si quis dicturus sit, Jurisconsultos præter *justitiam causæ* in bello *justitiam imperii*, & quidem ante omnia requirere, [*Bellum justum justitiâ imperii*] hæc quidem impudentia esset intoleranda, ut Religiosus unus (suscipue de quo habito, quod per inducias Ordines ab ipso *Hispania* Rege pro Supremis independentibus & legitimis agniti sunt) tantum sibi arrogaret, ut Domini jura & titulos examinaret, seque iudicem temporalium Potestatum constitueret: præscribente sacrâ Scripturâ nè ulterius progrediamur, quàm ut existimemus Potestates quæ præ sunt, à Deo ipso ordinatas. Titulos quidem imperii sive D. D. Ordinum, sive aliorum, scrutari, vix ipsis Principibus concessum est; privatis ex sola possessione iudicium faciendum, cætera Deo permittenda, qui Domina transfert quibus mediis divinæ suæ Providentiæ placuerit. Nam si ad constituendum, quis iusto aut injusto titulo dominetur, aliorum opiniones sequendæ sint, eorum præsertim quorum interest, ad paucos Principes Orbis imperium redigeretur, & jamdudum unicus esset *Papa Temporalis*, & unicus *Rex Spiritualis*: nisi potius unus tantum idemq; *Monarcha & Spiritualis & Temporalis*.

FINIS.

C P I X
#59603-22

REPRODUCED FROM THE COPY IN THE
HENRY E. HUNTINGTON LIBRARY

FOR REFERENCE ONLY. NOT FOR REPRODUCTION